


no.4

LES
REGRETS
DE CENDRIN.

M. D C. XV.



LES REGRETS DE CENDRIN.

O V les souspirs, mon cœur ! où sont ces souspirs entre-coupez, que le ressentiment des ruines de nostre bon país a dérobé à vostre compassion ? où les larmes, mes yeux ! où sont ces charitables larmes, que vous épandez tous les iours à ondes de regret, de la lascheté de nos bons François, *Pauvre Cendrin*, qui ne fors iamaïs de ta maison, que les larmes aux yeux, & les sanglots sur la lèvre, tirez du profond de ton cœur, trauaillé de déplaisir de nostre vanité ? que dis-tu de l'heureuse issuë de nos Estats ? de tous les costez des maisons de noz bazanez, on sent l'odeur des parfums qui brûlēt : on voit par tout des bouquets pendus en actions de graces, & satisfaction de leurs crimes : on oit le son des Luths & des flustes : ce ne sont que chants d'allegresse, & tous signes heureux d'une douce réjouissance : qu'en dis-tu ? las, *Mélas !* que ie n'aye vn grand, mais funeste sujet de pleurer plus que ne fit iamaïs mon ayeul des folies de ceux de son siècle.

Il est vray, il faut que ie le die, le conseil qui s'est prendre à nos Princes & autres bons Fran-

çois la resolution d'assembler les Estats, estoit
éclos d'une grande prudence, d'un saint zele,
& genereux courage, & le succès en pouvoit
estre heureux, si (pardon, belles ames, qui vous
estes comportees genereusement) on n'eust
mis pour un avant-mets un plat de pistoles à
l'Espagnolle, pour le decret de quelques De-
putez. Mais quoy? quel moyē de regarder sans
estre charmé: l'éclat de ce métal: la pluye d'or
faussa la tour d'airain, & viola la virginité de
Danaë, si estroitement gardee, la dédaigneuse
Atlante s'arresta au milieu de sa course, char-
mee de la beauté de trois pommes d'or; & le
rameau d'or donna à Ence ouverture au som-
bre Royaume de Pluton? Mais, Messieurs, qui
auez vos consciēces chargees de ce vice, pour
un dernier Adieu, agréez que ie vous die que
nous ne sommes pas nais pour nous, ains pour
nostre païs, que les loix nous redemanderont
un iour compte de nous, pour leur interest, &
que comme deserteurs de nostre charge, nous
en serons punis: hélas, que i'en pleure!

Les grandes entreprises, genereux Princes,
sont tousiours accompagnes des grandes tra-
uerfes; vostre glorieux zele alloit celebrer vo-
stre gloire, si vos ennemis jaloux de vostre hō-
neur n'eussent compromis de nostre bon-heur
& de nostre repos: Hélas, que i'en pleure! mais
courage, croyez-moy, tout vient à point qui
peut attendre; quand un extrême souffrance
d'un peuple genereux vient à se dénouier, el-
le produit des vengeancees plus grandes: car

prenant feu tout à coup, elle iette tous ses efforts à la premiere charge. Las, hélas que i'en pleure! & que ie crains qu'à ce iour de courroux la cire d'Icare ne se fonde à ce feu, les cordages de l'ancre ne se rompent à ce violent orage, & la sagesse de nos vieux Gaulois n'en soit à Guillot le songeur: La France, ie le croy, comme l'innocente Andromede est exposée aux monstres de quelque mal-heur, mais elle doit sa deliurance à Persee, à nostre Condé, & les Cieux doiuent ioindre son zele à vostre valeur, & fortifier son épée, des vostres: & bien que le desordre de ce tēps semble m'en démentir, toutesfois ie croy que la prouidence diuine a assez de ressorts & nouueaux secrets pour deliurer la France des menaces de la ruine.

Mais encore, Messieurs, nos Criminels, *Repetundarum & lase Majestatis*, vous pouuez-vous persuader, que si l'impunité de vos crimes a esté fauorisee par l'indulgence ou crainte de nos Deputez? Las que i'en pleure! que vous en deuiez rire, Messieurs, attendez la fin de la farce, ie pourrois dire que si la fortune couure, defend, & honore nos crimes, & que si nous sauuons de la loy que les iugemens naturels, & la crainte, qui ont des peines secondes, vous deuroient retenir de rire. Mais, Messieurs, croyez-moy, la peine suit de bien près le peché, elle naist à l'instāt avec le peché; quiconque l'attend, la souffre; & quiconque l'a meritee, l'attend. Les Dieux donnent souuent quelque delay, parce que leur clemence con-

trepointe leur Iustice : & cōme il n'y a plus de remede aux coups de leurs mains , ils ayment mieus differer pour vn temps, afin que les méchans ayent loisir de se recognoistre: Ainsi à la fin, comme tous les bons François ont partage aux traux, & à la gloire de ce grand Henry, ils ont aussi part tous au ressentimēt de l'assassinat commis en sa personne, & par consequent en prendront la vengeance : Helas que i'en pleure ! pleurez, larmoyez avec moy, vous tous qui auez traistreuement épanché le sang de nostre grand Henry, de nostre bon Pere, pleurez, vous aussi qui vous iouiez du bas âge de ses enfans, & de l'authorité de nostre ieune Roy: Helas que i'en pleure ?

Mon Dieu ! que ie croye que le Ciel ne leue bien tost le rideau pour nous faire voir les personnages, qui ont ioué ceste sanglante tragedie ? ie ne puis : car la verité, quoy qu'obscurcie par le nuage du temps, avec le temps se met au iour, comme les rayons du Soleil rompent les plus obscures & épaisses tenebres : C'estoit ce que les anciens Prestres des Idoles sembloient signifier, quand sacrifiant à leurs Dieux, ils ne découuroient la teste qu'au sacrifice de Saturne, auquel ils attribuoient la verité, pour monstrier que comme ils se découuroient en sacrifiant ce Dieu, qu'aussi la verité à la fin se découure ; & pourquoy ils l'a croyoient fille du temps : Et que ie ne croiray qu'à ce grand iour les bons François ne soient à ces traistres, comme vn Cambises enuers les

Sifanes, vn Agefilaüs enuers les Theſſaliens, & vn Antigone enuers les Maſias, & que tout ne ruiſſelle de ſang de ces meurtriers, & de ces parricides? ie le dois, puis que le ſang le purge par le ſang; Mais que i'en pleure!

Que ie croye auſſi que ce deſordre dure long-temps? que les petites planettes paſſent par le chemin où paſſe le Soleil? quel'eſtranger precede en honneur ceux qui ſont du païs? non, ie ne le puis croire: Car comme la Nobleſſe de Rome ietta les anneaux d'or quand elle vit que Flauius affranchy d'Appius eſtoit pourueu de l'eſtat d'Edile Curule, qu'on donnoit ſeulement aux Seigneurs les plus ſignalez en merites & en ſeruices; auſſi ie crains que tant de braues & genereux courages perdent patience: il eſt vray; c'eſt vne belle gloire de faire du bien: mais il faut regarder le merite de la perſonne en cé qui regarde l'honneur. Auguſte Ceſar eſtoit liberal en dons enuers ceux qui le meritoiët, mais il eſtoit épargnant des pures recompensés d'honneur, d'autant que l'honneur eſt vn priuilege qui tire ſa principale eſſence de la rareté & de la vertu meſme; il n'eſt plus en ſon auantage, s'il eſt paſſé en couſtume: Car les loyers d'honneur n'ont d'autre prix que cettuy cy. **Q V E P E V D E G E N S** en ioüiſſent, & puis il faut que ce ſoit le payement d'un Capitaine fameux, & d'une experience belliqueuſe, & qui ſoit encore de condition accommodable à vne telle dignité: car il ne faut pas loger vn Piſandre au

rang des genereux courages, d'autant qu'ils ne
 daignent s'auantager de ce qu'ils ont de com-
 mun avec des gens de peu en ces charges rele-
 uees, tel compagnon en diminuë le merite. Et
 quoy? n'est-ce pas raualer la gloire de ceux, dõt
 le bras a honoré leur renommee du loz de mil-
 le valeureux exploicts, de l'associer avec celuy,
 des exploicts duquel personne n'a cognoissan-
 ce, & desquels la nuit seule peut rendre quel-
 que témoignage, pource qu'ils ont eu honte
 de paroistre au iour? quelle grace de voir vne
 des plus belles & importantes charges de l'E-
 stat entre les mains des personnes qui iamais
 n'ont paru aux armes: iamais n'ont mis la main
 à l'épee: iamais endossé cuirasse, ny peut-estre
 picqué cheual? il ne faut pas que les lieux ho-
 norent les personnes; mais les personnes, les
 lieux: il faut que l'honneur de ces belles char-
 ges rejailisse plustost de la vertu à la personne,
 que de la personne à la vertu: Au-moins si ces
 ames, à qui la fortune est si fauorable, faisoient
 quelque belle saillie d'honneur: Et si cōme ce
 Romain, mocqué de son nom, dit qu'il ren-
 droit le nom des Cicerons plus illustres que
 ceux des Catons, des Brutulles, ny des Scaures,
 commençoient à se mettre sur le bien-faire: &
 si cōme les Romain^s, qui portoient le nom
 du bestail qu'ils nourrissoient, estans cepen-
 dāt trestous nourris à l'honneur, se releuoient
 & se mettoient sur selle l'épee au poing, au pre-
 mier tantare de trōpette, hélas ien'en pleure-
 rois pas! Mais arrestez-vous là, tireur l'aisné du
 Marquisat

Marquisat, n'aspirez pas à la Duché, de peur qu'après auoir esté fait Baron de la Plume, Marquis d'Ancre, vous ne soyez Duc de papier, & ne pressiez la plume & l'Anchre pour escrire sur ce papier la memorable histoire du progrez de vostre fortune, las que i'en pleure.

Et encore que ie croiray, que si par la facilité de plusieurs de nos Deputez, l'aliance d'Espagne a esté confirmée, que nous n'ayons encore des Condez, des Neuers, des Longueuilles, des Vandosmes, des Luxembourgs, des Turennes, des Rouans, & des Desdidières, qui auront l'œil au bois & aux menées qu'on pourroit faire sous ce beau pretexte d'Amour, aux des-advantages, & aux ruynes de cest Estat: O que ie le croy bien. Ouy braves Athlètes, tous nourris sous les palmes de vos ancestres, & sous les lauriers de vostre gloire, ie le croy: Et puis que vous estes le seul rempart de la grandeur de vostre jeune Roy, & la seule tour d'Airain qui n'a peu estre percée par la force de cest Or de Castille, j'espere que vous joindrez à la grandeur de vostre zèle, le mérite de vostre valeur. Ainsi representez-vous tous jours au dévant de vos ambitions le seruice de vostre jeune Roy, & l'honneur de vostre patrie, si c'est vn arrest du destin, que la gloire de cest Estat ne doive pas long temps fleurir, faites que le fer, où le feu de l'ennemy en soit la ruine, plus tost que ces menées & ces corruptions, s'il nous faut estre miserables, qu'il ny aye point de crime attaché à nostre misère, s'il nous arrive des infortunes, que ce soit sans les attirer sur nous par nos fautes, pour le moins il nous sera permis alors

de les plaindre en public, nous n'aurons point
 subject de les taire, ny de honte meslee parmi les
 larmes que nous en ietterons : Ainsi comme les
 Thiriens enchaînerent la statuë d'Apollon avec
 celle d'Hercule qui estoit leur protecteur, afin
 que si d'avanture Apollon offensé de leurs cri-
 mes, s'en vouloit aller, il fust arresté, car ils
 croyoient que leurs Dieux s'en alloient invoquez
 par les estrangers; aussi, puisque nous voyons que
 l'Estranger pour attirer les Dieux tutelaires de
 nostre bon-heur tasche de les corrompre, atta-
 chons les à Hercule, ie veux dire à la valeur de
 nostre espee, representons nous la valeur du gene-
 reux sang de ceux, dont nous auons tiré la nais-
 sance, armons nous du mesme courage, dont ils
 ont terrassé tant de fois cet ennemy de nostre
 gloire, & ne laissons perdre l'honneur, que nous
 ont acquis nos ancestres, autrement ie pleure.
 Helas! Messieurs, ne voyez vous pas vostre grand
 Henry, vostre genereux Hercule, sur le Pont-
 neuf à cheval armé de toutes pieces, le visage
 tourné vers le Palais, qui demande Iustice & de sa
 mort & de ses ruynes qu'on dresse à son Estat.
 Helas prenez sa cause! ô François, ô bons Fran-
 çois, ses iustes regrets veulent que vos armes
 vengent sa mort, & les ruines de cet Estat, ioi-
 gnez les vostres à celle que la douleur semble luy
 auoir fait prendre apres sa mort, secourez son
 dueil de vos forces; afin qu'avec vostre aide vne
 pieuse vengeance appaise l'ombre de ce braue
 traistreusement meurtry. Nous sommes tous
 Dieux, disoit vn certain, quand nous auons le
 cœur d'entreprendre ce que nous desirons: il faut

ofer beaucoup pour nous rendre la fortune favorable, ne luy denions donc ce dernier deuoir, autrement, ie pleure, ie pleure.

Tout beau, tout beau, Messieurs nos criminels, ne riez pas encore de la closture de nos Estats, Dieu manie les fortunes & infortunes de ce monde, selon sa disposition occulte, l'hiuer a ses glaces, comme l'esté les chaleurs, & l'air intemperé traîne les malignes influences: il n'est pas temps de rire, croyez-moy, les fortunes les plus esleuees, penchent tousiours du costé de leurs ruynes & les fleaux du Ciel, tombent sur ces testes orgueilleuses, qui en la vaine image, ou en l'ombre plustost d'un bon-heur passager se figurent d'inuidables felicitéz, les charmes d'une bonne fortune sont perilleux, le pere d'Alexandre est troublé au milieu de ses succez: Ouy, Messieurs, la prosperité nous charoüille, afin de nous faire trouuer plus rude la mer de l'aduersité, qu'elle ameine en queue, & se seruir de nous mesme pour la faire aduancer, & la hautesse de nostre fortune ne sert que pour d'autant plus nous rendre sensibles à la douleur, & nous faire tomber de plus haut, l'aduis que donna sur ce subiect Simonides à Pausanias, d'auoir tousiours le souuenir de sa naissance deuant les yeux pour retrancher à sa vanité l'occasion de se perdre: Helas, ie pleure quand ie remets en memoire la tragicque fin de l'heureux Polycrates, & quand ie vois que pour un contr'eschange de tant de bon-heur la fortune luy prepare un cordeau pour le pendre.

Mais, cependant, Messieurs nos bons Princes, si vous ne prenez garde à vous maintenir, on per-

dra la crainte de vostre autorité : Ne vous apperceuez-vous point combien vostre souffrance a diminué de vostre pouuoir, Les paroles femelles vous brauent, l'escritoire en fait de mesme : car l'affecte de les imiter & se flatte d'esperances toutes pareilles, si vous auez quelque soing de vous mesme, si l'ambition de nostre grandeur vous touche, seruez-vous de vostre autorité : c'est celle qui vous doit faire recognoistre : & quoy auourd'huy l'orgueil sera il desbordé si outrageusement qu'il fuscite des Geans, qui bouffis de presôption, veulent aller planter leur enseigne au dessus des lambris fleurdelisez, pour s'asseoir aux sieges des habitans des Cieux ? Las ! Helas que i'en pleure.

Mais, encore que i'en pleure, de voir que la piété, & la pitié couchées par terre sont maintenant foulées aux pieds : que le remede de nos Estats soit pire que le mal, si lors qu'on respondra aux cayers, on n'apporte au public quelque retranchement de tant de foule, & de tant de subsides, que de cris du pauvre peuple que i'entends : ie n'entends que ces tristes lamentations nos. Depuerez-vous ont delaissez, Ha ! i'en pleure, & ie voudrois que le bruit fust plus grand que le mal, mais contre mon desir, & avec mon regret. Le treque que le mal excède le bruit, Grand Dieu, zélé protecteur de la gloire de ceste Monarchie, destournez les desseins qu'on peut dresser aux ruines de cet Estat, gauchissez ce coup : & ne permettez que le sacré feu de Vesta soit esteint, donnez-nous le temps de voir nostre ieune Roy, en estat de recognoistre ceux qui sont seruiteurs de son Estat, de pouuoir venger des armes de son

juste courroux, le cruel parricide de son pere, & pour l'heur de ses armes nous redonner nostre ancien bon-henr, mettre ce grand corps en repos, & par des ordonnances plus equitables, que celle de nos Estats, regler & reformer ce grand, & general desordre, Helas ! mais cependant, que de pleurs ? que de larmes ?

Pauvres subjects, ie voudrois par mes consolations esleuer la constance de vos ames, pour alléger l'aigreur de vostre mal, vous avez subiect de vous affliger : Mais quoy ! il n'y a que le temps qu'y puisse remedier ? Courage, la nuict porte en trouble le iour, la tempeste le calme & la bonasse, les maux ont leur Amen, comme les biens leur inconstance, & peut estre à ceste responce qu'on doit faire aux Cahiers de vos Deputez, la compassion plaidera pour vostre misere ; & puis iettez les yeux de vostre ame sur mille maux semblables que vous avez par le passé soufferts, & vous esprouverez qu'un tel object adoucira le fiel de vos douleurs ; Vous ne pouuez blasmer nos Princes, sinon d'auoir esté trompez sous les esperances qu'on leur donnoit, qu'aux eslections des Deputez, les voix ne seroient violentees, que les Deputez seroient entiers, & sans passion, qu'à l'assemblée des Estats on auroit liberté de parler ? Helas ! que de pleurs, & de larmes, si on eust parlé : Mais quoy ! comme la Luberne tire à soy tous les animaux par son odeur, cachant la laideur de son regard, pour mieux les surprendre. Helas ! i'en pleure ! de voir comme les faux amis de cet Estar, pour conduire leurs ruineux desseins à leur fin, par de belles protestations de bonne volonté, &

apparences du bien public, apres auoir faict porter les armes à nos Princes ont tant faict (pour leuer le plus grand obstacle qui s'opposoit à leurs menees) qu'on a tenu les Estats à Paris, où ils ont avec aisance par la timidité de nos Deputez, qui erroient estre comme en prison, tire party de leurs passions, las, mais las, que i'en pleure!

Mais quoy! n'est-il pas vray qu'il faut porter sur le front ce qui est en l'esprit, comme dict Plotin, que le visage n'est qu'une ame racourcie, & comme son escusson a plusieurs quartiers, que les graces non assises, mais plantees, non escrites, mais burinees sur nos fronts, ne doiuent trahir, ny falsifier la bonté de nature, qui de son vray coing, a imprimé nos naturels sur nos fronts mesmes?

Mais, helas que i'en pleure! tout a degeneré, le front nous a trompé la parole, & tout nostre faict n'est composé que de pieces fausses, & comme vn Ethiopien disoit contre les parfums & la pourpre des Perses, que les huilles & habillemens des Perses estoient trompeurs; trompeuses sont aussi les figures du parler, tout y est enueloppé, & tournoyent à l'environ, rien de clair, ny de fin, comme les peintres qui rendent les choses claires plus apparentes & plus eminées par les ombres qu'ils mettent à l'entour. Helas que i'en pleure! vous en pleurez aussi braue Bourbon, & comme par droit de primauté & d'affection, vous auez interest à l'Etat, aussi vous deuez pleurer d'ouyr tant de lamentables claments, tascher d'y apporter quelque lenitif: & en vn mot releuer par vostre prudence ceste penchante couronne: vous auez esté trompé en la creance que vous auez

que les ennemis de cet Estat faisoient par raison; & par la consideration du bien public, ce qu'ils n'ont fait que pour aduantagez leurs pernicious desseins: Il est vray; l'exterieur a trompé vostre zele: Mais quoy! deuant que s'embarquer, vous deuiez pour recognoistre le vent, ne deplier qu'un bout des voiles, & l'ayant recogneu sans hazard voguer apres en assurance sur ceste mer. Mais quoy! pardon à vostre zele, vos considerations par trop sages offensent vostre qualité, & trahissent vostre merite: croyez moy, les destins ont reserué à vostre bras vainqueur la gloire des ruynes des ennemis de la grandeur de cet Empire, vous estes le fleau destiné des harpies de cest Estat & du parricide de nostre Grand Henry: quelle raisõ dõc vous fait retarder? la gloire des seruices que vous devez à vostre ieune Roy, & à la memoire de ce grand Henry, l'iniure qui luy a esté faicte nous doit animer naturellemēt à la vengeance, ou nous degenererions de la valeur & du courage de nos predecesseurs, & puis si la voix du peuple est la voix de Dieu, les cieus irritez de ce cruel assassinat, & des ruynes de ceste Monarchie, ourdissent leurs disgraces & vous promettent de la gloire à leur desauantage. Helas qu'il pleure que cela ne soit! Et vous braues Princes, braues François, Braues Neuers, qui sans delay voyez vostre reputation à prix courant par tout le monde, & qui cōme le Roy Atheas, n'aymes d'autre harmonie que les hannissements de cheuaux & fanfares de Mars, & vous braue de Longueuille, qui autant ennemy de l'estranger que vos predecesseurs ont esté animez à leur ruy-

ne, à ces premières orées de vostre courage, paroissez non traînant l'aïlle en terre, non avec le pied droit d'une tortue, mais porté sur l'air d'une genereuse ambition, & à qui l'attêdre fasche plus que le combattre, & vous brave Vendosme, qui digne heritier des genereuses vertus du pere, ne desirez auoir d'autres escussions, ny d'autres armoiries de vostre valeur, que les playes d'un estomac bresché de coups, Et vous brave Luxembourg qui sorty de la tige des plus grands Empeteurs du monde, tous zelez au seruice de cet Estat, suivez pas à pas leurs traces, croyez que l'honneur de vos actions & du zele que vous auez voué au bien de ceste Monarchie, ne se peut escrire que de vostre sang. Et vous tous qui n'avez à la l'ouche, ny sur le cœur, que *Vive le Roy, vive la France*. Escoutez la priere que la France vous fait pour son ieune Roy: *Cler sang de mon sang, heureux enfans, par lesquels ie m'estime heureux, enfans qui seuls releuez mon courage, & me donnez des forces, permettez-vous qu'on deschire le sein de vostre mere? Helas ie pleure, secourez vostre mere, Messieurs, reparez la faute de nos Deputez.*

Audiat hac Iupiter, qui fœdera fulmine sancit:

